

'Sayangkan Wilayah Persekutuan'

Warga KL, Labuan, Putrajaya perlu tunjuk semangat kekitaan

Kuala Lumpur: Sambutan Hari Wilayah Persekutuan diraikan pada 1 Februari setiap tahun, namun tahukah anda mengapa Kuala Lumpur, Labuan dan Putrajaya digelar Wilayah Persekutuan?

Wilayah Persekutuan ditubuhkan pada 1 Februari 1974 apabila Kuala Lumpur yang dahulunya, sebahagian daripada Selangor diserahkan oleh Sultan Selangor ketika itu, Sultan Salahuddin Abdul Aziz Shah, kepada Kerajaan Persekutuan untuk dijadikan ibu negara dan ditadbir secara langsung.

Labuan pula diangkat menjadi Wilayah Persekutuan kedua pada 1984 diikuti Putrajaya pada 2001.

Ketiga-tiga wilayah ini dikawal selia Kementerian Wilayah Persekutuan (KWP) dan setiap wilayah ditadbir oleh pihak berkuasa tempatan iaitu Dewan Bandaraya Kuala Lumpur bagi Kuala Lumpur, Perbadanan Labuan (Labuan) dan Perbadanan Putrajaya (Putrajaya).

Di bawah seliaan KWP, pelbagai pembangunan dan kemodenan membabitkan prasarana dapat dinikmati warga Wilayah Persekutuan.

Profesor Dr Zaid Ahmad dari Jabatan Pengajian Kenegaraan dan Ketamadunan Fakulti Ekologi Manusia, Universiti Putra



Masjid Putra di Putrajaya antara kebanggaan warga Wilayah Persekutuan.

(Foto hiasan)

Malaysia (UPM), berkata masih ramai yang tidak faham kepentingan ketiga-tiga wilayah ini diangkat sebagai Wilayah Persekutuan.

"Bila (wilayah) diserahkan kepada Kerajaan (Pusat) itu ertinya proses pembangunan lebih mudah dan lancar," katanya.

Zaid berkata, penyatuan tiga wilayah itu juga dilihat penting dalam merangsang perpaduan dan pertumbuhan ekonomi antara Semenanjung, Sabah dan Sarawak.

Namun, katanya masih ramai dilihat kurang memiliki rasa kekitaan dan berbangga menjadi warga Wilayah Persekutuan walaupun sambutan hari bersejarah

itu memasuki tahun ke-16.

"Di Wilayah Persekutuan, terutama Kuala Lumpur dan Putrajaya, kebanyakannya adalah mereka yang migrasi, bukan lahir dan membesar di situ, bukan tempat 'tumpah darah' mereka," katanya.

Bagaimanapun, beliau berkata fenomena itu boleh diubah dengan menanam semangat patriotisme dalam diri generasi zaman kini bermula sejak prasekolah.

"Generasi kini yang lahir dan tinggal di Wilayah Persekutuan ini perlu dididik dan diperkenalkan dengan memiliki rasa sayangkan Wilayah Persekutuan," katanya.

Sementara itu, Menteri Wilayah Persekutuan, Khalid Abdul Samad, berharap 29 program yang diatur sempena Sambutan Hari Wilayah Persekutuan (SHWP) 2020 akan terus menjadi penggerak utama bagi agenda memperkasa perpaduan dalam pelbagai lapisan masyarakat majmuk khususnya di Wilayah Persekutuan.

"Kita kena ingat Wilayah Persekutuan bila ditubuhkan, dimasukkannya juga Labuan kerana kita nak jadikan platform penyatuan dan perpaduan dalam kalangan masyarakat Semenanjung dan Borneo.

"Ini adalah usaha berskala kecil untuk mewujudkan perasaan ke-



Masih ramai juga dilihat kurang memiliki rasa kekitaan dan berbangga menjadi warga Wilayah Persekutuan walaupun sambutan hari bersejarah itu masuki tahun ke-16.

Zaid Ahmad,
Profesor Jabatan Pengajian Kenegaraan dan Ketamadunan Fakulti Ekologi Manusia UPM

satuan kekitaan, dan kesamaan. 'Sayangi Wilayahku' yang dipilih tahun ini adalah tema yang berterusan hingga kita merasakan perasaan kesatuan itu benar-benar tercapai," katanya.

Khalid juga mengajak semua warga Wilayah Persekutuan berganding bahu dalam menjadikan wilayah berkenaan lebih maju dan lestari untuk dihuni.

BERNAMA